

三河縣志

傅增湘
書



三河縣志
十六卷

李錦熙題

汪河縣志序

州邑之有志原於列國之史所以記一時之治績後來之文獻
鑑焉第求其佳者近世惟康氏武功諸志其餘無聞直隸州邑
之志舊稱陸清獻靈壽縣志一書誠得紀傳之體蓋其人鉅儒
以一邑之身懷天下之大故其文卷帙無多而深厚宏闊成一
家之言非李元仲諸人有意撫古而反破其體例者可比余官
是地久亦嘗從事於斯凡河渠祀典賑紀亦既輯有成書欲爲
通志拾遺補闕而尤喜諸屬吏有能留意一州一邑之志者如
吳守廣平府志楊牧蔚州志補洪令寶坻縣志及遷安燕令沙
河杜令兩縣志大率體例明核文辭雅正則皆爲文以序傳之
誠以作吏者捧檄蒞官布一邑之宜欲周知地方利弊于以興

三河縣志
之剔之以成一代風俗之善要在鑒古人之成迹則志乘誠不可少焉三河爲畿東要地密邇首善霑被聖天子之雅化者最深極厚乃百餘年來竟未有志即略具草稿亦不醇不備未付剞劂按風土者有微憾焉陳令景宰洵四年四民咸安之庚辰冬旣以選授麻哈州將去馳謁余以邑志適竣事請余一言弁簡端夫信今傳後作志之法也修廢舉墜有司之職也陳令於數年中輯成此書不以去任易厥志陳令可爲知本矣繼自今宰斯土者展卷發冊曉然于立政之宜未必非治道之一助也余故嘉其意爲書此以畀之使與吳君諸書俱不泯焉

乾隆二十五年歲次庚辰十二月太子太保都察院右都御史
總督直隸兼理河道軍功加三級桐城方觀承撰

三河縣志序

乾隆丙子歲余蒙制府題授洵邑早夜惕厲思所以報稱者必先周知一邑之疆域山川津梁道里戶口賦役土俗民情而後可以盡厥職因索舊志於掾吏吏曰未有也久而始獲康熙年間前令鄭公富民所輯志稿略而未備其序云邑故無志志之者始於明季邑令王公自謹修於國初邑令任公塾而皆未鋟木今相去又五十餘年矣故老淪亡遺書散佚歷年愈久陳迹愈湮後之人將欲述古準今求斯邑文獻所在其孰從而詢之余竊惟邑自漢潞縣始至唐開元而始有三河之名上下二千餘年凡山川之險易井里之參差城池學校之興廢戶口賦役之多寡與夫驛站倉庫代革世沿風物人材蔚生鬱秀志之不

可以已也况洵邑密邇京師首善之區我國家重熙累洽聖聖相承涵濡深厚皇上湛恩汪濊休養生息雅化日隆可無邑志以備輶軒之採哉余時時默爲搜羅考訂而未敢遽率爾也歷三年己卯略有成緒是冬集邑紳士於明倫堂謀於薛學博文儒李司訓溥作修志計屬丁尉世榮專司提調延請江南孝廉王大信邑紳董炳偕子姪貢生植滋舉人存矩等相與旁搜遐攬各抒所學互相考索而以正史經傳會典一統志文集雜著之書訂其得失復採擇舊志之可存者改刪譌謬仍列原序於卷首以表前人披輯之意又寒暑一週五易稿而始成然後送太史朱東江先生鑒定呈請督憲錫之序文以弁簡端謹急付梓庶傳一邑之信焉第洵邑旣無刻志又無傳書邑中更鮮稽

古治聞之士欲求太史公所云其文雅馴昌黎所云擇焉精語
焉詳者烏可得耶語云始事也簡茲志不過就聞見備遺忘聊
存文獻於什一俾徇之疆域山川津梁道里戶口賦役土俗民
情可展卷而知其梗槩云爾時

乾隆二十五年嘉平穀旦

勅授奉直大夫知三河縣事陞麻哈州知州陳景序

三河縣志稿原序

三河漢潞縣地也隸京東去都門百十里而遙蓋圻服巖邑云
日者予遊長安邸聞燕薊薦紳先生譚說其風土迥然思與其
沉鷲樸茂者遊而上下其議論未得也亡何承乏是邑及歷其
疆土望其山川犁然一重地焉暇進掌故者索視邑乘對以無
有悵然者久之按周禮有閭史惇史掌書一鄉之善惡以待輶
軒之使采風而獻之况國家之郡縣乎郡縣而亡乘無論風俗
龐醇無所考見而封域田賦之制戶口錢穀之額寄在簿書者
將爲猾胥所上下莫可究竟矣若之何以清弊源告後人也乃
謀於侍御東橋蕭公學博賈君與邑庠二三同志共訂修之書
成凡十有二卷臚分縷晰庶幾可備檢閱矣第邑故無志又無

郡書可考所采者惟喬公起莘遺草及通州志略而已因其帙而增飾之專有望於後之君子知三河縣事王自謹撰

三河縣志稿原叙

余奉命令檀州三年復膺特簡調洵洵距檀百里許均古漁陽地而洵爲京東孔道恭遇皇上東宮展謁陵寢皇子親王以時分薦蒲伏供應近爲天下第一而且屬國之貢道出于茲間左之謫發出於茲山海之漁獵亭障關塞之戍守無一不出於茲視檀較益繁凜凜乎有盤錯之虞偶於圈移踏履之餘戶籍編竣之暇進掌故者索邑乘視之應以兵燹後舊刻無存止手錄二冊備覽余思邑志之重與國史等盛世憲章傳信萬世手錄焉足據閱之自萬歷以前僅稱差備其後百餘年文獻無徵遺跡荒略以畿輔風物文章之美而近事無稽君子缺焉余承乏茲土思欲修釐舊章纂成信史而學識寡陋勢不能以一手目

之長舉千百世之績夫以良史才如班馬輩擅長今古猶多遺議何得漫無確見輕爲論著耶爰延集通邑同志廣搜稗乘自萬歷以來其灾祥風俗吏治得失人物盛衰變革損益諸事悉各一欸以本地人紀本地事所聞所見必確必公若夫忠孝節義廉潔高逸有關名教者尤宜詳列事維大而可垂善雖小而必錄人無論貴賤事不拘顯晦表微闡幽是余之責也夫遂於乙酉歲閱數月研精編輯稿始就捐俸殺青授之梓庶有成書徵信後來而余亦藉以免瘵曠焉但慮時異世殊人往風微後之君子尙相繼而成其志毋闕人亦無闕事共襄一代鉅典上尊國體下表民風斯又予之厚幸已知三河縣事鄭富民撰

舊志後序

邑志古列國史也豈惟炫麗耀侈擷奇攝秀特爲一方觀美之具已耶觀風者將采而登之王府成昭代之信史志史之初筆也可廢乎哉三河設自唐初上下千餘年何獨無志也慨昔王郎流毒鼓輦啓釁已無寧日至石晉割以賂遼終元世五百禩文獻寥寥迨我太祖肇造區夏成祖定鼎燕都始爲左輔重地涵濡聖化稱彬彬雅焉但去邊鄙百里而近兵戈相尋凡古今事實湮沒無聞而馭民制度復因時屢遷故未有志誠缺典也萬歷甲申夏王心翁來蒞茲土慨然以興革爲已任通變宜民百度聿新乃捐俸創脩縣志謬委役於余余惟事莫難於紀實孔子能言夏殷禮而嘆杞宋之無徵考亭歷江浙閩海所在以脩

志爲亟聖賢豈徒資博洽托空言已也固將灼前聞而見諸行事爾矣因殫心研精以次以輯其間別綱標目損益去取惟翁指授焉至於附論則又參諸父老非一人之私言也更寒暑三脫稿而成書極知蕪蔓不足以信後或一披閱而經理之始末可據寧忍視爲虛車耶是故觀天文而察變齊政之道昭矣觀地理而脩德設險之實敦矣觀建置而幹蠱傾否之志奮矣觀風土而轉移化道之機溥矣觀財賦而用一緩二之矜切矣觀典禮而天明地察之敬凝矣觀官政而忠君愛國之心生矣觀人物選舉武備而兼善達道之義重觀藝文而崇雅黜浮之習端舉其實弗泥其迹原其意弗害其辭庶幾按圖索駿藉釜得魚未必無補於疲邑也翁之治洵也英敏中寓寬大若興學校

勸農桑慎刑獄平出納繕城署清驛道實心實政有未易名言
者脩志乃餘事也因備錄於此俾觀者知民惠有自云邑人監
察御史蕭九峯撰

凡例八則

一曰原始三河本古臨洵地置縣於唐開元四年分併隸屬歷代攸殊所建城池廨舍學校壇壝一經移置則荒薺野棠誰復識其故址語有之往事之不忘後事之師也爲採史集以詳原委亦祭川先河之義云

一曰分類比事屬辭春秋教也後世作史者莫能外邑志雖小亦當部居類列庶若網在綱有條不紊今分爲十四類如職方形勝建置典禮賦役鄉閭風物職官選舉兵防水利人物雜識藝文以十四類分爲若干卷於類之中又別爲節目若干條而以古蹟附形勝以積貯附賦役以存卹附典禮以保甲附鄉閭其他比類稱名各依其類以無失體要之義焉

一曰序次卷帙既編次第宜審夫星紀攸分疆域始定則職方固宜首列矣詳訂山川安流奠峙則形勝次之國有興立沿革相仍則建置次之城邑既作秩祀斯崇則典禮次之任土以作貢度地以居民觀風以問俗故次賦役次鄉閭次風物官師所以式一方縉紳所以型四境故次職官次選舉捍禦所以弭寇盜灌溉所以備水旱激勸所以勵人倫故次兵防次水利次人物而邑之可傳者具是矣他若軼事見於他說遺言可作箴規亦蒐羅所必及也故次以雜識名公卿遺澤之留賢士夫贈答之什亦經術之一助也故終以藝文閱者以序求之不有先後互相發明者乎

一曰取義彰善癉惡史家之法即史家之義也顧史備勸懲故

善惡兼舉志則意在表揚惟善是與非敢失實但節取而不
槩其生平蓋十室之邑有忠信而薰德之後皆善良三河土
瘠民淳人多自好苟聞風興起而蒸蒸向善則又司牧者之
所深幸而非僅取善善欲長之義也

一曰闕疑列國之有志實與史書相表裏史以傳信非以傳疑
也山川人物風土民情上備輶軒之採下供稽古之徵若僅
憑故老之傳聞何以爲後人之考據洵邑向無傳志又無載
籍可稽則名葺而實創未能深考不敢訛以傳訛本郭公夏
五之章也

一曰表微幽蘭不以無人而不芳貞士不以無知而改操洵邑
山盤水駛風氣廉潔士固矜名而女亦多立節粵稽圖史所